

摘藻堂四庫全書薈要

子部

欽定四庫全書薈要

子部

御製律呂正義後編卷九十三



詳校官主事臣陳木

欽定四庫全書薈要卷一萬一千二十九

子部

御製律呂正義後編卷九十三

樂章考一

郊祀

漢

東漢

魏

晉

宋



齊

梁

# 樂章考

正大小雅朝廷燕饗之樂歌三頌宗廟享祀之樂歌周頌附魯商而為三商之樂歌乃傳至今說經者謂魯宗國也孔子殷人也故以魯殷附焉未必然也諸國或各有頌惟魯天子之賜樂也故魯可存若夫夏之大濩當亦必有樂歌而杞變於夷則亡之孔子無從而存之也若夫五子之歌載於夏書明良之歌載於虞書孔子之時苟有存者無使

其亡之理審是則八伯之日月光華帝堯之襲乎  
鼓軒乎舜禹之至人代天等辭皆好事者所為信  
也茲編歷代樂章於

本朝樂章之後蓋竊取三頌及殷之義其自漢始以  
迄於明而不及周以上者以既見於詩書則不必  
編其非詩書所載則又不敢編也

歷代郊祀樂章

案禮祭天地有樂者為降神也故易曰雷出地奮豫

先王以作樂崇德殷薦之上帝以配祖考周官曰作樂於圜丘之上天神皆降作樂於方澤之中地祇皆出又曰乃奏黃鐘歌大呂舞雲門以祀天神乃奏太簇歌應鐘舞咸池以祀地祇由斯而言以樂祭天地其來尚矣故敘歷代樂章自郊祀始

### 漢郊祀歌

漢書禮樂志云武帝定郊祀之禮乃立樂府采詩夜誦有趙代秦楚之聲以李延年为協律都尉召司馬

相如等數十人造為詩賦畧論律呂以合八音之調  
作十九章之歌案陳氏樂書曰漢馬象赤蛟之類皆  
歌之宗廟故汲黯曰凡王者作樂上以承祖宗下以  
化兆民今陛下得馬詩以為歌協於宗廟先帝百姓  
豈能知其音耶据此十九章宗廟亦用之然考漢書  
禮樂志曰郊祀歌十九章其詩曰云云則十九章郊  
樂也十七章廟樂也分載甚明今姑從之

練時日一



練時日侯有望煇管蕭延四方九重開靈之旂垂惠恩  
鴻祐休靈之車結玄雲駕飛龍羽旄紛靈之下若風馬  
左蒼龍右白虎靈之來神哉沛先以雨般裔裔靈之至  
慶陰陰相放惠震澹心靈已坐五音飭虞至旦承靈億  
牲繭粟粢盛香尊桂酒賓八鄉靈安留吟青黃徧觀此  
眇瑤堂衆嫿竝綽奇麗顏如荼兆逐靡被華文厠霧縠  
曳阿錫佩珠玉俠嘉夜茝蘭香澹容與獻嘉觴

## 帝臨二

帝臨中壇四方承宇繩繩意變備得其所清和六合制  
數以五海內安寧興文偃武后土富媪昭明三光穆穆  
優游嘉服上黃

青陽三

青陽開動根茲以遂膏潤并愛跂行畢逮霆聲發榮穰  
處頃聽枯槁復產乃成厥命衆庶熙熙施及夭胎羣生  
堪堪惟春之祺

朱明四

朱明盛長專與萬物桐生茂豫靡有所詘敷華就實既  
阜既昌登成甫田百鬼迪嘗廣大建祀肅雍不忘神若  
宥之傳世無疆

西顥五

西顥沆碭秋氣肅殺含秀垂顥續舊不廢姦偽不萌妖  
孽伏息隅辟起遠四貉咸服既畏茲威惟慕純德附而  
不驕正心翊翊

玄冥六

玄冥陵陰蟄蟲蓋藏草木零落抵冬降霜易亂除邪革  
正異俗兆民反本抱素懷樸條理信義望禮五嶽籍斂  
之時掩收嘉穀

惟泰元七

惟泰元尊媼神蕃釐經緯天地作成四時精建日月星  
辰度理陰陽五行周而復始雲氣雷電降甘露雨百姓  
蕃滋咸循厥緒繼統恭勤順皇之德鸞路龍鱗

建始元年丞相

匡衡奏罷鸞路龍鱗句  
更定詩曰涓選休成

罔不肸飾嘉籩列陳庶幾宴享

滅除凶災列騰八荒鐘鼓箏笙雲舞翔翔招搖靈旗九  
夷賓將

天地八

天地竝況惟予有慕爰熙紫壇思求厥路恭承禋祀緼

豫為紛黼繡周張

匡衡奏罷黼繡周張句  
更定詩曰肅若舊典

承神至尊千

童羅舞成八溢合好効歡虞泰一九歌畢奏斐然殊鳴

琴箏笙會軒朱璆磬金鼓靈其有喜百官濟濟各敬厥

事盛牲實俎進聞膏神淹留臨須搖長麗前掞光耀明

寒暑不忒況皇章展詩應律銷玉鳴函宮吐角激徵清  
發梁揚羽申以商造茲新音永久長聲氣遠條鳳鳥翔  
神夕奄虞盖孔享

日出入九

日出入安窮時世不與人同故春非我春夏非我夏秋  
非我秋冬非我冬泊如四海之池偏觀是耶謂何吾知  
所樂獨樂六龍六龍之調使我心若訾黃其何不徠下

天馬十

案漢書武帝紀曰元鼎四年秋馬生渥洼水中

作天馬之歌太初四年春貳師將軍李廣利斬  
大宛王首獲汗血馬來作西極天馬之歌禮樂  
志曰天馬歌元狩三年馬生渥洼水中作李斐  
曰南陽新野有暴利長武帝時遭刑屯田燉煌  
界數於渥洼水旁見羣野馬中有奇者與凡馬  
異來飲此水利長先作土人持勒鞮於水旁後  
馬玩習久之代土人持勒鞮收得其馬獻之欲

神異之云從水中出也又禮樂志曰天馬來太  
初四年誅宛王獲宛馬作西域傳曰大宛國多  
善馬馬汗血言其先天馬子也應劭云大宛有  
天馬種蹏躅石汗血蹏躅石者謂蹏躅石而有跡言  
其蹏堅利汗血者謂汗從前肩膊出如血號一  
日千里也張騫傳曰漢武帝初發書易曰神馬  
當從西北來得烏孫馬好名曰天馬及得宛馬  
汗血益壯更名烏孫馬曰西極馬宛馬曰天馬



云又史記樂書稱武帝伐大宛得千里馬名蒲  
梢作歌曰天馬來兮從西極經萬里兮歸有德  
承靈威兮降外國涉流沙兮四夷服與此又不  
同

太一沉天馬下霑赤汗沫流赭志倣儻精權奇蕭浮雲  
晻上馳體容與逝萬里今安匹龍為友

天馬來從西極涉流沙九夷服天馬來出泉水虎脊兩  
化若鬼天馬來歷無草徑千里循東道天馬來執徐時

將搖舉誰與期天馬徠開遠門竦予身逝昆侖天馬徠  
龍之媒游閭闔觀玉臺

天門十一

天門開誅蕩蕩穆竝騁以臨饗光夜燭德信著靈浸平  
而鴻長生豫大朱涂廣夷石為堂飾玉梢以舞歌體招  
搖若永望星留俞塞隕光照紫幄珠煥黃幡比駉回集  
貳雙飛常羊月穆穆以金波日華耀以宣明假清風軋  
忽激長至重觴神裴回若留放殳冀親以肆章函蒙祉

福常若期寂寥上天知厥時泛泛溱溱從高旂殷勤此  
路臚所求佻正嘉吉宏以昌休嘉碑隱溢四方專精厲  
意逝九閼紛紜六幕浮大海

## 景星十二

案景星一曰寶鼎歌漢書武帝紀曰元鼎四年  
夏六月得寶鼎后土祠旁作寶鼎之歌禮樂志  
曰景星元鼎五年得鼎汾陰作如淳曰景星者  
德星也見無常常出有道之國

景星顯見信星彪列象載昭庭日親以察參侔開闔爰  
推本紀汾睢出鼎皇祐元始五音六律依韋饗昭雜變  
竝會雅聲遠姚空桑琴瑟結信成四興遞代八風生殷  
殷鐘石羽籥鳴河龍供鯉醇犧牲百末旨酒布蘭生泰  
尊柘漿析朝醒微感心攸通修名周流常羊思所并穰  
穰復正直往寧馮螭切和疏寫平上天布施后土成穰  
穰豐年四時榮

齊房十三

案齊房一曰芝房歌漢書武帝紀曰元封二年  
夏六月甘泉宮內中產芝九莖連葉作芝房之  
歌應劭云芝芝草也其葉相連瑞應圖云王者  
敬事耆老不失舊故則芝草生內中謂後庭之  
室也故詔書曰上帝溥臨不異下房賜朕宏休  
是也禮樂志曰齊房元封二年芝生甘泉齊房  
作

齊房產草九莖連葉宮童効異披圖按諫元氣之精回

復此都蔓蔓日茂芝成靈華

后皇十四

后皇嘉壇立玄黃服物發冀州兆蒙祉福沆沆四塞假  
狄合處經營萬億咸遂厥宇

華十五

華曄曄固靈根神之旂過天門車千乘敦昆侖神之出  
排玉房周流雜拔蘭堂神之行旌容容騎沓沓般從從  
神之徠泛翊翊甘露降慶雲集神之揄臨壇宇九疑賓

夔龍舞神安坐鷄吉時共翊翊合所思神嘉虞申貳觴  
福滂洋邁延長沛施祐汾之阿揚金光橫泰河莽若雲  
增陽波徧臚驩騰天歌

### 五神十六

五神相包四隣土地廣揚浮雲托嘉壇椒蘭芳璧玉精  
垂華光益億年美始興交於神若有承廣宣延咸畢觴  
靈輿位偃蹇驤奔汨臚析奚遺淫淥澤汪然歸

### 朝隴首十七

案朝隴首一曰白麟歌漢書武帝紀曰元狩元  
年冬十月行幸雍獲白麟作白麟之歌顏師古  
云麟麋身牛尾馬足黃色圓蹄一角角端有肉  
朝隴首覽西垠雷電秦獲白麟爰五止顯黃德圖勾虐  
熏鬻強闢流離抑不祥實百僚山河餐挽回轅鬻長馳  
騰雨師灑路陂流星殞感惟風蕭歸雲撫懷心

象載瑜十八

案象載瑜一曰赤鴈歌漢書禮樂志曰太始三



年行幸東海獲赤鴈作

象載瑜白集西食甘露飲榮泉赤鴈集六紛員殊翁雜  
五采文神所見施祉福登蓬萊結無極

赤蛟十九

赤蛟綏黃華蓋露夜零晝暍溢百君禮六龍位勺椒漿  
靈已醉靈既享錫吉祥芒芒極降嘉觴靈殷殷爛揚光  
延壽命永未央杳冥冥塞六合澤汪濊輯萬國靈裊裊  
象輿轡票然逝旗透蛇禮樂成靈將歸託玄德長無衰

東漢郊祀曲

案漢明帝定樂四品一曰大予樂郊廟上陵用之二  
曰雅頌樂辟雍饗射用之三曰黃門鼓吹樂天子宴  
羣臣之所用四曰短簫鐃歌樂軍中之所用今所傳  
者惟短簫鐃歌二十二曲所謂大予雅頌黃門鼓吹  
樂章未有傳焉意東漢承用樂章未之有改特定樂  
名為大予樂而已其辭即前郊祀十九章與

魏郊祀曲

案史志載武帝平荊州獲漢雅樂郎河南杜夔使創  
定雅樂又有散騎常侍鄧靜尹商善訓雅樂歌師尹  
胡能歌宗廟郊祀之曲然其所定之雅樂及郊廟之  
曲史無傳焉其可見者惟短簫鐃歌諸曲耳陳氏祥  
道云魏文帝既受漢禪雖有改樂舞之名無變詩歌  
之實故蕭子顯曰魏辭不見疑用漢辭也

### 晉郊祀歌

晉武帝受命之初百度草創泰始二年詔郊祀明堂

禮樂權用魏儀遵周室肇稱殷禮之義但改樂章而  
已使傅玄為之詞云晉書樂志曰武帝泰始二年詔  
傅玄造郊祀明堂歌辭其祀天地五郊有夕牲歌迎  
送神歌及饗神歌凡五章

夕牲歌

天命有晉穆穆明明我其夙夜祇事上靈常於時假迄  
用其成於薦玄牡進夕其牲崇德作樂神祇是聽

迎送神歌

宣文蒸哉日靖四方永言保之夙夜匪康光天之命上帝是皇嘉樂殷薦靈祚景祥神祇降假享福無疆

饗神歌 三章

天祚有晉其命維新受終於魏奄有黎民燕及皇天懷和百神丕顯遺烈之德之純享其玄牡式用肇禋神祇來格福祿是臻

時邁其猶昊天子之祐享有晉兆民戴之畏天之威敬授人時不顯不承於猶繹思皇極斯建庶績咸熙庶幾

夙夜惟晉之祺

宣文惟后克配彼天撫寧四海保有康年於乎緝熙肆用靖民爰立典制爰修禮紀作民之極莫匪資始克昌厥後永言保之

晉天地郊明堂歌

案宋書樂志曰晉前所作天地郊明堂歌有夕牲歌降神歌天郊饗神歌地郊饗神歌明堂饗神歌其夕牲降神天地郊明堂同用案此凡五章傳玄造但郊

祭天社祭地此云地郊殆因禮經郊社之禮所以事上帝故地亦謂之郊歟但禮經不言后土省文也何得以地而亦混之為郊耶

夕牲歌

皇矣有晉時邁其德受終於天光濟萬國萬國既光神定厥祥虔於郊祀祇事上皇祇事上皇百福是臻巍巍祖考克配彼天嘉牲匪斂德馨惟饗受天之佑神化四方

降神歌

於赫大晉膺天景祥二帝邁德宣茲重光我皇受命奄  
有萬方郊祀配享禮樂孔章神祇嘉饗祖考是皇克昌  
厥後保祚無疆

天郊饗神歌

整泰壇祀皇神精氣感百靈賓蒞朱火燎芳薪紫烟遊  
冠青雲神之體靡象形曠無方幽以清神之來亢景照  
聽無聞視無兆神之至舉歆歆靈爽協動余心神之坐



同歡娛澤雲翔化風舒嘉樂奏文中聲八音諧神是聽  
咸潔齊並芬芳烹牲享玉觴神悅饗歆禋祀祐大晉  
降繁祉祚京邑行四海保天年窮地紀

地郊饗神歌

整泰圻竢皇祇衆神感羣靈儀陰祀設吉祀施夜將極  
時未移祇之體無形象潛泰幽洞忽荒祇之出夢若有  
靈無遠天下母祇之來遺光景昭若存終冥冥祇之至  
舉欣欣舞象德歌成文祇之坐同歡豫澤雨施化雲布

樂八變聲教敷物咸亨祇是娛齊既潔侍者肅玉觴進  
咸穆穆饗嘉猷德馨祚有晉暨羣生溢九壤格天庭  
保萬壽延億齡

明堂饗神歌

經始明堂享祀匪懈於皇烈考光配上帝赫赫上帝既  
高既崇聖考是配明德顯融率土敬職萬方來祭常于  
時假保祚永世

宋南郊登歌

案宋書樂志曰元嘉十八年九月有司奏二郊宜奏  
登歌值軍興事寢二十二年南郊始設登歌詔御史  
中丞顏延之造歌詩案延之所造者有天地郊夕牲  
迎送神饗神雅樂登歌凡三章

夕牲歌

黃威寶命嚴恭帝祖表海炳岱系唐胄楚靈鑑濬文民  
屬獻武奄受敷錫宅中拓宇亘地稱皇聲天作主月竈  
來賓日際奉土開元首正禮交樂舉六典聯事九官列

敘有牲在滌有潔在俎以薦王衷以答神祐

迎送神歌

維聖饗帝維孝饗親皇乎備矣有事上春禮行宗祀敬  
達郊禋金枝中樹廣樂四陳陟配在京降德在民奔精  
照夜高燎煬晨陰明浮爍沈縈深淪告成大報受釐元  
神月御按節星驅序輪遙興遠駕耀耀振振

饗神歌

營泰時定天衷思心獻謀筮從建表蒔設郊宮田燭置

燿火通歷元旬律首吉飾紫壇坎列室中星兆六宗秩  
乾宇宴地區謚大孝昭祭禮供牲日展盛自躬具陳器  
備禮容形舞綴被歌鐘望帝閣聳神蹕靈之來辰光溢  
潔粢酌娛太一明輝夜華晷日裸既始獻又終烟薌鬯  
報清穹饗宋德祚王功休命永福履充

宋明堂歌

案南齊書樂志曰明堂祀五帝漢郊祀歌皆四言宋  
孝武使謝莊造辭莊依五行數木數用三火數用七

土數用五金數用九水數用六郭氏茂倩曰洪範五行一曰水二曰火三曰木四曰金五曰土月令木數八火數七土數五金數九水數六蔡邕云東方有木三土五故數八南方有火二土五故數七西方有金四土五故數九北方有水一土五故數六又納音數一言得土三言得火五言得水七言得金九言得木若依洪範木數用三則應水一火二金四也若依月令金九水六則應木八火七也當以洪範一二之數

言不成文故有取捨而使兩義並違未詳以數立文  
為何依據也周頌我將祀文王皆四言其一句五言  
一句七言歌太祖亦無定句宋書樂志曰迎送神歌  
詩依漢郊祀迎神三言四句一轉韻

### 迎神歌

地紐謐乾樞回華盖動紫微開旌蔽日車若雲駕六氣  
乘綢繆曄帝京輝天邑聖祖降五靈集構瑤祀聳珠簾  
漢拂幌月棲檐舞綴暢鐘石融駐飛景鬱行風懋粦盛

潔牲脞百禮肅羣司度皇德遠大孝昌貫九幽洞三光  
神之安解玉鑒景福至萬寓歡

登歌

舊四言

雖臺辨朔澤官練辰潔火夕照明水朝陳六瑚貢室八  
羽華庭昭事先聖懷濡上靈肆夏戒敬升歌發德永固  
鴻基以綏萬國

歌太祖文皇帝詞

依周頌體

維天為大維聖祖是則辰居萬寓綴塗下國內靈八輔



外光四瀛蒿宮仰蓋日館希旌複殿留景重檐結風刮  
楹接緯達嚮承虹設業設虞在王庭肇禋祀克配乎靈  
我將我享維孟之春以孝以敬以粒我蒸民

歌青帝詞 三言依木數

參昴夕駟照晨靈乘震司青春鴈將向桐始蕤柔風舞  
暄光遶萌動達萬品新潤無際澤無垠

歌赤帝詞 七言依火數

龍精初見大火中朱光北至圭景同帝在在離實司衡

水雨方降木槿榮庶物盛長咸殷阜恩覃四冥被九有

歌黃帝詞 五言依土數

履建宅中寓司繩御四方裁化遍寒燠布政周炎涼景  
麗條可結霜明冰可折凱風扇朱辰白雲流素節分至  
乘結晷啟閉集恒度帝運緝萬有皇靈澄國步

歌白帝詞 九言依金數

百川如鏡天地爽且明雲冲氣舉德盛在素精木葉初  
下洞庭始揚波夜光徹地飜霜照懸河庶類收成歲功

行欲寧浹地奉渥罄宇承秋靈

歌黑帝詞

六言依水數

歲月既宴方馳靈承坎德司規玄雲合晦鳥路白雲繁  
亘天涯雷在地時未光飭國典閉闕梁四節遍萬物殿  
福九域祚八鄉晨晷促夕漏延大陰極微陽宣鵲將巢  
冰已解氣濡水風動泉

送神歌

蘊禮容餘樂度靈方留景欲暮開九重肅五達鳳參差

龍已沫雲既動河既梁萬里照四空香神之車歸清都  
璇庭寂玉殿虛睿化凝孝風熾顧靈心結皇思

齊南郊樂歌

案南齊書樂志曰武帝建元二年有司奏郊廟雅樂  
歌辭舊使學士博士撰搜簡採用請敕外凡肄學者  
普令製立參議太廟登歌宜用司徒褚淵餘悉用黃  
門郎謝超宗辭超宗所撰多刪顏延之謝莊辭以為  
新曲備改樂名永明二年又詔王儉造太廟二室及

郊配辭其南郊樂羣臣出入奏肅咸之樂牲出入奏  
引牲之樂薦豆呈毛血奏嘉薦之樂凡夕牲歌並重  
奏迎神奏昭夏之樂皇帝入壇東門奏永至之樂升  
壇奏登歌初獻奏文德宣烈之樂次奏武德宣烈之  
樂太祖高皇帝配饗奏高德宣烈之樂飲福酒奏嘉  
胙之樂送神奏昭夏之樂就燎位奏昭遠之樂還便  
殿奏休成之樂重奏凡十三章內十二章謝超宗撰

一章王儉撰

羣臣出入奏肅威之樂

案此章係宋顏延之所造夕牲歌內改黃威為  
黃承帝祖為帝緒嚴恭帝緒句下刪去表海炳  
岱系唐胄楚楚靈鑑濬文民屬獻武四句又改宅  
中為升中月竈為月域九官列序句下復刪去  
有牲在滌有潔在俎以薦王衷以答神祐四句  
黃承寶命嚴恭帝緒奄受敷錫升中拓宇亘地稱皇罄  
天作主月域來賓日際奉土開元首正禮交樂舉六典

聯事九官列序

牲出入奏引牲之樂

案此章肅肅明明句下超宗參用顏延之夕牲歌內有牲在滌四句陟配在京四句又參用顏延之昭夏樂中語

皇乎敬矣恭事上靈昭教國祀肅肅明明有牲在滌有潔在俎以薦王衷以答神祐陟配在京降德在民奔精望夜高燎佇晨

薦豆呈毛血奏嘉薦之樂

案此章我恭我享惟孟之春以孝以敬粒我蒸  
民及設業設虞五句俱謝莊歌宋太祖詞

我恭我享惟孟之春以孝以敬粒我蒸民青壇奄霽翠  
幙端凝嘉俎重薦兼藉再升設業設虞展容玉庭肇禋  
配祀克對上靈

以上夕牲歌並重奏

迎神奏昭夏之樂



案此章俱宋顏延之原詞內惟孝享親下謝超  
宗刪去皇乎備矣有事上春二句廣樂四陳句  
下刪去陟配在京降德在民奔精夜照高燎燭  
晨陰明浮爍沈滢深淪六句又移告成大報受  
釐元神二句作末句

惟聖饗帝惟孝饗親禮行宗祀敬達郊禋金枝中樹廣  
樂四陳月御案節星驅扶輪遙興遠駕曜曜振振告成  
大報受釐元神

入壇奏永至之樂

紫壇望靈翠幙佇神率天奉贄罄地來賓神貺並介泯  
祇合祉恭昭鑒享肅光孝祀威藹四靈洞曜三光皇德  
全被大禮流昌

升壇奏登歌詞

報惟事天祭實尊靈史正嘉兆神宅崇禎五時昭鬯六  
宗彝序介丘望塵皇軒肅舉

初獻奏文德宣烈之樂

案此章係宋顏延之辭謝超宗於謀筮從句下

刪去建表藹設郊宮二句燿火通句下刪去歷

元句律首吉飾紫壇坎烈室中星兆六宗秩乾

宇宴地區謚八句大孝昭句下增入國禮融一

句刪去祭禮供牲日展盛自躬具陳器備禮容

形舞綴被歌鐘望帝閭聳神蹕靈之來辰光溢

潔粢酌娛太一明輝夜華哲日裸既始獻又終

烟薌鬯報清穹饗宋德胙王功休命永福履充

共二十三句又思心睿改睿字作緒

營泰時定天衷思心緒謀筮從田燭置燿火通大孝昭  
國禮融

次奏武德宣烈之樂

功燭上宙德耀中天風移九域禮飾八埏四靈晨炳五  
緯宵明膺歷締運道茂前聲

太祖高皇帝配饗奏高德宣烈之樂

案此章永明二年尚書令王儉造

饗帝嚴親則天光大焉奕前古榮鏡無外日月宣華卿  
雲流靄五漢同休六幽咸泰

飲福酒奏嘉胙之樂

望嘉禮承休錫盛德符景緯昌華應帝策聖靄耀昌基  
融祉暉世歷聲正涵月軌書文騰日迹寶瑞昭神圖靈  
貺流瑞液我皇崇暉祚重芬冠往籍

送神奏昭夏之樂

薦饗洽禮樂該神娛展辰旆回洞雲路拂璇階紫霄藹

青霄開睠皇都顧玉臺留昌德結聖懷

就燎位奏昭遠之樂

天以德降帝以禮報牲鐸俯陳柴幣仰燎事展司采敬  
達瑄鄉烟贄青昊震颺紫場陳馨示策肅志宗禋禮非  
物備福惟誠神

還便殿休成之樂重奏

昭事上祀饗薦具陳回鑒轉翠拂景翔宸綴縣敷暢鐘  
石昭融羽炫深晷籥暄行風肆序輟度肅禮停文四金

聳衛六馭齊輪

齊北郊樂歌

案南齊書樂志曰周頌昊天有成命郊祀天地也是則周漢以來祭天地皆同辭矣宋顏延之撰饗地神辭一篇餘與南郊同齊則北郊羣臣入奏肅咸樂牲入奏引牲薦豆毛血奏嘉薦皇帝入壇東門奏永至飲福酒奏嘉胙還便殿奏休成辭並與南郊同其異者迎神奏昭夏之樂升壇奏登歌初獻奏地德凱容

之樂次奏昭德凱容之樂送神奏昭夏之樂瘞埋奏  
隸幽之樂又隋書樂志曰齊氏承宋咸用元徽舊式  
宗祀朝饗奏樂俱同惟增北郊之禮乃元徽所闕永  
明六年之所加也內送神之樂宋孝建二年秋起居  
注云奏肆夏永明中改奏昭夏凡六章謝超宗撰  
迎地神奏昭夏之樂

詔禮崇營敬饗玄時靈正丹帷月肅紫墀展薦登華風  
縣凝鏘神惟戾止鬱葆遙莊昭望歲芬環遊辰太穆哉



尚禮橫光秉藹

升壇登歌

佇靈敬享禋肅彝文縣動聲儀薦潔牲芬陰祇以貺昭  
司式慶九服熙度六農祥正

初獻奏地德凱容之樂

繕方丘端國陰掩珪晷仰靈心詔源委遍丘林禮獻物  
樂薦音

案此章南齊書載謝超宗用宋顏延之辭刪去

遍丘林下八句及樂薦音下二十二句而宋書  
所載顏辭祇雅樂登歌三篇獨不見此章豈史  
之闕歟

次奏昭德凱容之樂

慶圖濬邈蘊祥祕瑤覩天炳月嬪光紫霄邦化靈懋間  
則風調儷德方儀徽載以昭

送神奏昭夏之樂

薦神升享序楹淹玉俎傳金奏寶旆轉旒駕旋溢素景

鬱紫躔靈心顧留宸睟洽外瀛瑞中縣

瘞埋奏隸幽之樂

后皇嘉慶定祇玄時承帝休圖祇敷靈祉篚罍周序軒  
朱凝會牲幣芬壇精明佇蓋調川瑞昌警岳祥泰

齊明堂樂歌

案南齊書樂志曰明堂歌辭祀五帝漢郊祀歌皆四  
言宋孝武使謝莊造辭莊依五行數木數用三火數  
用七土數用五金數用九水數用六建元初詔黃門

郎謝超宗造明堂夕牲等辭並採用謝莊辭賓出入奏肅咸樂牲出入奏引牲樂薦豆呈毛血奏嘉薦樂迎神奏昭夏樂皇帝升明堂奏登歌初獻奏凱容宣烈之樂還東壁受福酒奏嘉胙樂送神奏昭夏樂並建元永明中所奏也其凱容宣烈樂嘉胙樂太廟同用凡十四章謝超宗撰

賓出入奏肅咸樂歌辭二章

彝承孝典恭事嚴聖浹天奉賁擊壤齊慶司儀具序羽

容夙章芬枝揚烈黼構周張助寶奠軒酌珍充庭璆縣  
凝會琚朱竚聲先期選禮肅若有承祇對靈祉皇慶昭  
膺

尊事威儀輝容昭序迅恭明神潔盛牲俎肅肅嚴宮藹  
藹崇基皇靈降止百祇具司戒誠望夜端烈承朝依微  
昭旦物色輕宵

牲出入奏引牲樂

案引牲樂嘉薦樂昭夏樂登歌凱容宣烈樂南

齊書樂志誤編在送神昭夏樂之後未有既送  
神而方迎牲者行禮次第顛倒已極因從郭茂  
倩樂府次於肅咸樂後青帝歌前

惟誠絜饗惟孝尊靈敬芳黍稷敬滌犧牲騂繭在簠載  
溢載豐以承宗祀以肅皇衷蕭芳四舉華火周傳神鑒  
孔昭嘉足參牲

薦豆呈毛血奏嘉薦樂二章

肇禋戒祀禮容咸舉六典飾文九司炤序牲柔既昭犧

剛既陳恭滌惟清敬事惟神如籩再御兼俎兼薦節動  
軒越聲流金縣

奕奕閔幄亶亶嚴幃絜誠夕鑒端服晨暉聖靈戾止翊  
我皇則上綏四寓下洋萬國永言孝饗孝饗有容儼僚  
贊列肅肅雍雍

迎神奏昭夏樂

案此歌俱仍謝莊之舊惟改輝天邑為耀天邑  
五靈集為五雲集又五雲集句下刪去構瑤祀

聳珠簾漢拂幌月棲檐舞綴暢鐘石融駐飛景  
鬱乃風八句餘並同

地紐謚乾樞回華蓋動紫微開旌蔽日車若雲駕六氣  
乘烟燭暉帝景耀天邑聖祖降五雲集懋梁盛絜牲牲  
百禮肅羣司虔皇德遠大孝昌貫九幽洞三光神之安  
解玉鑾昌福至萬寓歡

升明堂登歌辭純用謝莊辭已見前不復載

初獻奏凱容宣烈樂

太廟同用



醴醴具登嘉俎咸薦饗洽誠陳禮周樂徧祝辭罷裸序  
容輟縣蹕動端庭鑒回嚴殿神儀駐景華漢高虛八靈  
案衛三祇解途翠蓋澄耀畢帟凝晨玉鎮息節金輅懷  
音式誠達孝底心肅感追馮皇鑒思承淵範神錫懋祉  
四緯昭明仰福帝徽俯齊庶生

青帝歌

案此歌皆謝莊之舊惟柔風改作和風

參映夕駟昭晨靈乘震司青春鴈將向桐始蕤和風舞

暄光遶萌動達萬品親潤無際澤無垠

赤帝歌

案此歌仍謝莊之舊惟恩覃改作恩澤

龍精初見大火中朱光北至圭景同帝在在離實司衡  
雨水方降木董榮庶物盛長咸殷阜恩澤四溟被九有  
黃帝歌

案此歌將謝莊辭炎涼句下刪去景麗條可結  
霜明冰可折凱風扇朱辰白雲留素節四句其

司繩御四方句御字改為總字

履艮宅中宇司繩總四方裁化徧寒燠布政司炎涼至  
分乘經畧閉啟集恒度帝暉緝萬有皇靈澄國步

白帝歌

案此歌刪去謝莊辭木葉初下洞庭始揚波夜  
光徹地飈霜照懸河九言二句又改德盛在素  
精為盛德在素精聲字承秋靈為聲字承帝靈  
餘並同

百川若鏡天地爽且明雲冲氣舉盛德在素精庶類收  
成歲功行欲寧浹地奉渥罄宇承帝靈

黑帝歌

案此歌超宗改謝莊辭歲月既宴方馳為歲既  
暮日方馳玄雲合晦鳥路為玄雲合晦鳥蹊又  
白雲繁亘天涯句下刪去雷在地時未光飭國  
典閉闔梁二句大陰極微陽宣句下刪去鵲將  
巢冰已解氣濡水風動泉二句

歲既暮日方馳靈乘坎德司規玄雲合晦鳥蹊白雲繁  
亘天涯晨晷促夕漏延大陰極微陽宣

還東壁受福酒奏嘉胙樂

太廟同用

禮薦洽福祚昌聖皇膺嘉祐帝業凝休祥居極乘景運  
宅德瑞中王澄明臨四奧精華延八鄉洞海同聲懋徹  
宇麗乾光靈慶纏世祉鴻烈永無疆

送神奏昭夏樂

案此辭仍用謝莊之舊惟改睿化凝為鴻化凝

未更增四言四句

蘊禮容餘樂度靈方留景欲暮開九重肅五達鳳參差  
龍已沫雲既動河既梁萬里照四空香神之車歸清都  
璇庭寂玉殿虛鴻化凝孝風熾顧靈心結皇恩鴻慶遐  
望嘉薦令芳翊帝明德永祚深光

齊雩祭樂歌

案南齊書樂志曰明帝建武二年雩祭明堂謝朓造  
辭一依謝莊惟世祖四言也今案迎神歌歌世祖武

皇帝歌青帝歌赤帝歌黃帝歌白帝歌黑帝送神歌

凡八章謝朓撰

迎神歌

依漢東郊歌三言宋明堂迎神八解

清明暢禮樂新候龍景選貞辰陽律亢陰晷伏耗下土  
薦種稷震儀警言王度乾嗟雲漢望昊天張盛樂奏雲儻  
集五精延帝祖雱有諷縈有秩膺鬯芬圭瓚瑟靈之來  
帝閭開車煜燿吹徘徊停龍犧徧觀此涼雨飛祥風靡  
壇可臨莫可歆對泯祉鑒皇心

世祖武帝歌

依廟歌四言

濬哲維祖長發其武帝出自震重光御寓七德攸宣九  
疇咸敘靜難荆舒凝威彘浦

昧旦丕承夕惕刑政化壹車書德馨梁盛昭星夜景非  
雲曉慶衢室成陰璧水如鏡

禮充玉帛樂被管絃於鑠在詠陟配於天自宮祖兆靡  
愛牲牲我將我享永祚豐年

青帝歌

木生數三



營翼日鳥殷宵凝冰泮玄蟄昭景陽陽風習習女夷歌

東皇集樽

南齊書  
作奠

春酒秉青珪命田祖渥羣黎

赤帝歌

火成數七

惟此夏德德恢台雨龍既御炎精來火景方中南訛秩  
靡草云黃含桃實族雲翳鬱溫風煽興雨祁祁黍苗徧

黃帝歌

土成數五

稟火自高明毓金挺剛克涼燠資成化羣方載厚德陽  
季勾萌達炎徂溽暑融商暮百工止歲極凌陰冲皇流

疏已清原隰甸已平咸言祚惟億敦民保齊景

白帝歌

金成數九

帝悅於兌執矩固司藏百川收潦精景應徂商嘉樹離  
披榆闕命賓鳥夜月如霜秋風方嫋嫋商陰肅殺萬寶  
咸亦道勞哉望歲場功冀可收

黑帝歌

水成數六

白日短玄夜深招搖轉移太陰霜鐘鳴冥陵起星回天  
月窮紀聽嚴風來不息望玄雲黝無色曾冰冽積羽幽

飛雲至天山側闔梁閉方不巡合國吹饗蜡賓克微陽  
究終始百禮洽萬觀臻

送神歌

敬如在禮將周神之駕不少留躡龍鑣轉金蓋紛上馳  
雲之外警七耀照八神排闥闥度天津有淦興膚寸積  
雨冥冥又終夕俾栖糧惟萬箱皇情暢景命昌  
齊藉田樂歌

案南齊書樂志曰漢章帝元和元年班固奏用周頌

載芟祀先農晉傳玄作祀先農先蠶夕牲歌詩一篇  
迎送神一篇饗社稷先農先聖先蠶歌詩三篇辭皆  
敘田農事胡道安作先農饗神詩一篇樂府相傳舊  
歌三章永明四年耤田詔江淹造耤田歌淹製二章  
不依故傳世祖口勅付太樂歌之案耤田之禮雖少  
殺於郊社然天降嘉種地生百穀亦當附於郊祀之  
後南齊耤田樂歌先農迎送神升歌及饗神歌凡二

章江淹撰

祀先農迎送神升歌

羽鑾從動金駕時遊聲騰義鏡樂綴禮修率先丹耦躬  
遵綠疇靈之聖之歲殷澤柔

饗神歌

瓊掌既飾繡簋以陳方燮嘉種永毓宵民

梁雅樂歌

案隋書樂志曰梁初郊禋宗廟及三朝之樂並用宋  
齊元徽永明儀注惟改嘉祚為永祚又去永至之樂

何佟之周捨議案周禮王出入奏王夏大祭祀與朝會同用而漢制皇帝在廟奏永至朝會別奏皇夏二樂有異於禮為乖乃除永至還用皇夏蓋秦漢已來稱皇故變王夏為皇夏也及武帝定國樂並以雅為稱取詩序云言天下之事形四方之風謂之雅雅者正也論語云雅頌各得其所故曰雅止乎十二則天數也乃至階步之樂增撤食之雅焉衆官出入奏俊雅皇帝出入奏皇雅皇太子出入奏胤雅王公出入

奏寅雅上壽酒奏介雅食舉奏需雅撤撰奏雍雅牲  
出入奏滌雅薦毛血奏牲雅降神及迎送奏誠雅皇  
帝飲福酒奏獻雅燎埋奏禋雅其辭並沈約所製普  
通中薦蔬之後改諸雅歌勅蕭子雲製辭既無牲牢  
遂省滌雅牲雅云案十二雅今載皇雅滌雅牲雅誠  
雅獻雅禋雅者以二郊明堂與太廟同用也凡十一  
章沈約撰

皇雅 三首

案隋書樂志曰皇帝出入奏皇雅取詩大雅云  
皇矣上帝臨下有赫也二郊太廟同用

帝德實廣運車書靡不賓執瑁朝羣后垂旒御百神八  
荒重譯至萬國婉來親

華蓋拂紫微勾陳繞太一容裔被緹組參差羅罕畢星  
回照以爛天行徐且謐

清蹕朝萬寓端冕臨正陽青絢黃金纓袞衣文繡裳既  
散華蟲采復流日月光



滌雅

隋書樂志曰牲出入奏滌雅取禮記郊特牲云  
帝牛必在滌三月也二郊明堂太廟同用

將修盛禮其儀孔熾有膋斯牲國門是寘不黎不瘠靡  
僇靡忌呈肌獻體永言昭事俯休皇德仰綏靈志百福  
具膺嘉祥允洎駿奔伊在慶覃遐嗣

牲雅

隋書樂志曰薦毛血奏牲雅取春秋左氏傳云

牲牲肥腍也二郊明堂太廟同用

反本興敬復古昭誠禮容宿設祀事孔明華俎待獻崇  
碑麗牲充哉繭握肅矣簪纓其膺既啟我豆既盈庖丁  
遊刃葛盧驗聲多祉攸集景福來并

誠雅 三首

隋書樂志曰降神及迎送神奏誠雅取尚書大  
禹謨云至誠感神也南郊降神用懷忽慌北郊  
迎神用地德溥二郊明堂太廟送神同用我有

明德

懷忽慌瞻浩蕩盡誠絜致虔想出杳冥隆無象皇情肅  
具僚仰人禮盛神途敬僛明靈申敬饗感蒼極洞元壤  
地德溥崑丘峻揚羽翟鼓應輦出尊祇展誠信招海瀆  
羅嶽鎮惟福祉咸昭晉

我有明德馨非稷黍牲至孔備嘉薦惟旅金懸宿設和  
樂具舉禮達幽明敬行樽俎鼓鐘云送遐福是與

獻雅

隋書樂志曰皇帝飲福酒奏獻雅取少牢饋食  
禮云祝酌授尸主人拜受爵禮記祭統云尸飲  
五君洗玉爵獻卿今之飲福酒亦古獻爵之義  
也二郊明堂太廟同用

神宮肅肅天儀穆穆禮獻既同膺此釐福我有馨明無  
愧史祝

禋雅二首

隋書樂志曰燎埋奏禋雅取周禮大宗伯云以

裡祀祀昊天上帝書曰裡于六宗也就燎用紫  
宮昭煥就埋用盛樂斯舉

紫宮昭煥太一微玄降臨下土尊高上天載陳珪璧式  
備牲粢雲狐清引枸虞高懸俯昭象物仰致高煙肅彼  
靈祉咸達皇虔

盛樂斯舉協徵調宮靈饗慶洽祉積化融八變有序三  
獻已終坎牲瘞玉酬德報功振垂成呂投壤生風道無  
虛致事由感通於皇盛烈比祚華嵩

# 梁南北郊明堂登歌

案登歌者祭祀燕饗堂上所奏之歌也禮記明堂位曰升歌清廟下管象武仲尼燕居曰入門而金作示情也升歌清廟示德也下而管象示事也是故古之君子不必親相與言也以禮樂相示郊特牲曰奠酬而工歌發德也歌者在上匏竹在下貴人聲也周禮大師職曰大祭祀帥瞽登歌令奏擊拊小師曰大祭祀登歌擊拊尚書大傳曰古者帝王升歌清廟大琴

練絃達越大瑟朱絃達越以韋為鼓不以竽瑟之聲

亂人聲清廟升歌歌先人之功烈德澤苟在廟中當  
見文王者愀然如復見文王故書曰夏擊鳴球搏拊  
琴瑟以詠祖考來格此之謂也案登歌各頌祖宗之  
功烈去鐘撤竽以明至德所以傳云其歌之呼也曰  
於穆清廟於者歎之也穆者敬之也清者欲在位者  
徧聞之也隋書樂志曰大戴云清廟之歌懸一磬而  
尚搏拊在漢之世獨奏登歌近代以來始用絲竹舊

三朝設樂皆有登歌梁武以為登歌者頌祖宗功業  
非元日所奏於是去之後以其說非通復用於嘉慶  
後周登歌備鐘磬琴瑟階上設笙管隋亦因之合於  
儀禮荷瑟升歌及笙人立於階下間歌合樂是燕飲  
之事也祀神宴會通行之若大祀臨軒陳於壇之上  
若冊拜王公設宮懸不用登歌釋奠則惟用登歌而  
不設懸梁南北郊明堂徧歌五帝德並奏登歌凡九

章沈約撰



南郊登歌

二章

瞰既明禮告成惟聖祖主上靈爵已獻壘又盈息羽觴  
展歌聲儼如在結皇情

禮容盛尊俎列玄酒陳陶匏設獻清旨致虔絜王既升  
樂已闋降蒼昊垂芳烈

北郊登歌

二章

方壇既埴地祇已出盛典弗僭羣望咸秩乃升乃獻敬  
成禮卒靈降無兆神饗載謐允矣嘉祚其升如日至哉

坤元實惟厚載躬茲奠饗誠交顯晦或升或降搖珠動  
佩德表成物慶流皇代純嘏不訐祺福是賚

明堂登歌

歌青帝

帝居在震龍德司春開元布澤含和尚仁羣居既散歲  
云陽止飭農分地人粒惟始雕梁繡栱丹楹玉墀靈威  
以降百福來綏

歌赤帝

炎光在離火為威德執禮昭訓持衡受則靡草既彫溫  
風以至嘉薦惟旅時羞孔備齊醴在堂笙鏞在下匪惟  
七百無絕終始

### 歌黃帝

鬱彼中壇含靈闡化迴環氣象輪無輟駕布德焉在四  
序將收音宮數五飯稷駟駟宅屏居中旁臨外宇升為  
帝尊降為神主


### 歌白帝

神在秋方帝居西皓允茲金德歲成萬寶鴻來雀化參  
見火邪幕無玄鳥菊有黃華載列笙磬式陳彝俎靈罔  
常懷惟德是與

歌黑帝

德盛乎水玄冥紀節陰降陽騰氣凝象閉司智莅坎駕  
鐵衣玄祈寒坼地晷度迴天悠悠四海駿奔奉職祚我  
無疆永隆人極

御製律呂正義後編卷九十三



總校官庶吉士臣張能照

校對官中書臣馮培

謄錄監生臣周志禮

欽定四庫全書薈要

子部

御製律呂正義後編卷九十四



詳校官主事臣陳本

欽定四庫全書薈要卷一萬一千三十

子部

御製律呂正義後編卷九十四

樂章考二

郊祀

陳

魏

齊

周

隋







陳郊祀歌

按陳承梁祚未遑制作郊廟所奏竝用梁樂惟改七  
室舞辭

後魏樂歌

魏來自雲朔肇有諸夏樂操土風未忘其俗道武天  
興初吏部郎鄧彥海所奏上樂創制宮懸而鐘管不  
備樂章既闕雜以簫邏迴歌至太武平河西得沮渠  
蒙遜之伎賓嘉大禮皆雜用焉此聲所興蓋苻堅之

末呂光出平西域得胡戎之樂因又改變雜以秦聲  
所謂秦漢樂也孝文頗為詩歌以勗在位布諸音律  
大臣馳騁漢魏旁羅宋齊功成奮豫代有制作莫不  
各揚廟舞自造郊歌而不載於史今莫可考

# 北齊南郊樂歌

案隋書樂志曰文宣初禪未遑改制至武成之時始  
定四郊宗廟三朝之樂大禘圜丘及北郊夕牲羣臣  
入門奏肆夏樂迎神奏高明樂登歌辭同牲出入薦

毛血竝奏昭夏羣臣出進熟羣臣入竝同奏肆夏辭  
同初入進熟皇帝入門奏皇夏升丘奏皇夏壇上登  
歌辭同初獻奏高明樂奠爵訖奏高明之樂覆燾之  
舞獻太祖配饗神座奏武德之樂昭烈之舞皇帝小  
退當昊天上帝神座前奏皇夏辭同上飲福酒奏皇  
夏詣東陛還便坐奏皇夏辭同初入門送神降丘南  
陛奏高明樂之望燎位奏皇夏辭同上紫壇既燎奏  
昭夏樂自望燎還本位奏皇夏辭同上還便殿奏皇

夏羣臣出奏肆夏辭同上祀感帝用圜丘樂凡十三章

夕牲羣臣入門奏肆夏

肇應靈序奄宇黎人乃朝萬國爰徵百神祇展方望幽顯咸臻禮崇聲協執列珪陳翼差麟次端笏垂紳來趨動色式贊天人

迎神奏高明

登歌辭同

惟神監矣皇靈肅止圜壁展事成文即始士備八能樂

合六變風湊伊雅光華襲薦宸衛騰景靈駕霏烟嚴  
壇生白綺席凝玄

牲出入奏昭夏

剛柔設位惟皇配之言肅其禮念暢在茲飾牲舉獸載  
歌且舞既捨伊膋致精靈府物色惟典齋沐加恭宗族  
咸暨罔不率從

薦毛血奏昭夏

展禮上月肅事應時薦粟為用交暢有期弓矢斯發笾

蔡將事園神致祀率由先志和以鸞刀臭以血膋至哉  
敬矣厥義孔高

進熟皇帝入門奏皇夏

羣臣出奏肆夏進熟羣臣入奏肆夏辭同初入

帝敬昭宣皇誠肅致玉帛齊軌屏攝咸次三垓上列四  
陛旁升龍陳萬騎鳳動千乘神儀天藹睟容離曜金根  
停軫奉光先導

陞丘奏皇夏

壇上登歌辭同

紫壇雲曖紺幄霞褰我其陟止載致其虔百靈竦聽萬

國咸仰人神咫尺應盼嚮

初獻奏高明

上下眷旁午從爵以質獻以恭咸斯暢樂惟雍孝敬闡  
臨萬邦

奠爵訖奏高明

自天子之會昌神道丘陵肅事克光天保九闕洞開百  
靈環列八樽呈備五聲投節

獻太祖配饗神座奏武德

皇帝小退當昊天上帝  
神座前奏皇夏辭同上

皇

夏

配神登聖主極尊靈敬宣昭燭咸達宵冥禮宏化定樂  
贊功成穰穰介福下被羣生

飲福酒奏皇夏

諸東陛還便坐又奏  
皇夏辭同初入門

皇心緬且感吉蠲奉至誠赫哉光盛德乾川

古坤字

詔百

靈報福歸昌運承佑播休明風雲馳九域龍蛟躍四溟  
浮幕呈光氣儷象燭華精漢武方知恥韶夏僅同聲

送神降丘南陛奏高明

就望燎位又奏皇  
夏辭同上皇夏



獻享畢縣侑周神之駕將上游超斗極絕河流懷萬國  
寧九州欣帝道心顧留帟上下荷皇休

紫壇既燎奏昭夏

自望燎還本位奏  
皇夏辭同上皇夏

玄黃覆載元首照臨合德致禮有契其心敬申事闋絜  
誠云報玉帛載升棧樸斯燎寥廓幽曖播以馨香皇靈  
惟監降福無疆

還便殿奏皇夏

羣臣出奏肆夏辭同上  
肆夏祠感帝用圜丘辭

天大親嚴匪敬伊孝永言肆饗宸明增耀陽丘既暢大

典逾光乃安斯息欽若舊章天迴地旋鳴鑾引警且萬  
且億皇歷惟永

北齊北郊樂歌

案隋書樂志曰齊北郊迎神奏高明樂登歌辭同薦  
毛血奏昭夏進熟皇帝入門皇帝升丘並奏皇夏奠  
爵訖奏高明樂覆燾之舞送神降丘南陛奏高明樂  
既瘞奏昭夏樂還便殿奏皇夏餘並同南郊樂凡八  
章

迎神奏高明

案此章與南郊迎神高明辭同只惟神改惟祇  
圜壁改方琮成文即始改即陰成理餘並同

惟祇監矣皇靈肅止方琮展事即陰成理士備八能樂  
合八變風奏伊雅光華襲薦宸衛騰景靈駕霏烟嚴壇  
生白綺席凝玄

薦毛血奏昭夏

案此章亦與南郊薦毛血昭夏辭同惟圜神改

萬祇

展禮上月肅事應時繭粟為用交暢有期弓矢斯發  
簪將事萬祇致祀率由先志和以鸞刀臭以血膋至哉  
敬矣厥義孔高

進熟入門奏皇夏

案此章與南郊進熟皇夏辭同惟三垓改重垓  
四陞改分陞

帝敬昭宣皇誠肅致玉帛齊軌屏躡咸次重垓上列分

陞旁升龍陳萬騎鳳動千乘神儀天藹睟容離曜金根  
停軫奉光先導

升丘奏皇夏

案此章與南郊升丘辭同

層壇雲曖嚴幄霞褰我其陟止載致其虔百靈竦聽萬  
國咸仰人神咫尺玄應盼蠻

奠爵訖奏高明

案此章與南郊奠爵辭同惟丘陵肅事改為方

澤祇事

自天子之會昌神道方澤祇事克光天保九闕洞開百  
靈環列八樽呈備五聲投節

送神降丘南陞奏高明

案此章與南郊送神辭同惟超斗極絕河流二  
句改為超荒極憩崑丘

獻享畢懸佾周神之駕將下游超荒極憩崑丘懷萬國  
寧九州欣帝道心顧留帟上下荷皇休

既痊奏昭夏

案此章與南郊既燎辭同惟玉帛載升改為牲  
玉載陳

玄黃覆載元首照臨合德致禮有契其心敬申事闋絜  
誠云報牲玉載陳棧樸斯燎寥廓幽曖播以馨香皇靈  
惟鑒降福無疆

還便殿奏皇夏

案此章與南郊還便殿辭同惟陽丘既暢改為

陰澤云暢

天大親嚴匪敬伊孝永言肆饗宸明增耀陰澤云暢大  
典逾光乃安斯息欽若舊章天迴地旋鳴鑾引警且萬  
且億皇歷惟永

北齊五郊樂歌

案隋書樂志曰齊五郊迎氣降神並奏高明樂又曰  
禮五方上帝並奏高明之樂為覆燾之舞

青帝歌



歲云獻谷風歸斗東指鴈北飛電鞭激雷車遽虹旌靡  
青龍馭和氣洽具物滋飜降止應帝期

赤帝歌

嫫女司旦中呂宣朱精御節離景延根荻俊茂溫風發  
柘火風水應炎月執衡長物德孔昭赤旗霞曳會今朝  
黃帝歌

居中布五運乘衡畢四時含養資羣物協德固皇基  
緩契王風持載符君德良辰動靈駕承祀昌邦國

白帝歌

風涼露降馳景颺寒精  
山川搖落平秩在西成  
蓋藏成積蒸人被嘉祉  
從享來儀鴻休溢千祀

黑帝歌

虹藏雉化告寒水壯地坼年殫  
日次月紀方極九州萬邦獻力  
叶光是紀歲窮微陽潛兆方融  
天子赫赫明聖享神降福惟敬

北齊明堂樂歌

案隋書樂志曰齊祀五帝於明堂先祀一日夕牲羣

臣入自門奏肆夏太祝令迎神奏高明樂覆燾舞太祖配饗奏武德樂昭烈舞五方天帝並奏高明樂覆燾舞辭同迎神牲出入薦毛血並奏昭夏樂羣臣出進熟羣臣入並奏肆夏辭同初入進熟皇帝入門及升壇並奏皇夏辭同用初獻裸獻並奏高明樂覆燾舞飲福酒奏皇夏太祝送神奏高明樂覆燾舞還便殿奏皇夏凡十一章

先祀一日夕牲羣臣入自門奏肆夏

國陽宗祀嚴恭有聞荒華胥暨樂我大君冕瑞有列禽  
帛載敘羣后師師威儀容與執禮辨物司樂考章率由  
靡墜休有烈光

太祝令迎神奏高明

祖德光國圖昌祇上帝禮四方闕紫宮洞華闕龍獸奮  
風雲發飛朱雀從玄武攜日月帶雷雨耀宇內溢區中  
眷帝道感皇風帝道康皇風扇采盛列椒糈薦神且寧

會五精歸福祿幸閭亭

太祖配饗奏武德

我惟我祖自天之命道被歸仁時屯啓聖運鍾千祀授  
手萬姓夷允掩虐匡頽翼正載經載營庶土咸寧九功  
以洽七德兼盈丹書入告玄玉來呈露甘泉白雲郁河  
清聲教咸往舟車畢會仁加有形化洽無外嚴親惟重  
陟配惟大既祐斯歌率土攸賴

牲出入奏昭夏

孝饗不匱精絜臨年滌牢委溢形色博牲于以用之言  
承歆祀肅肅威儀敢不敬止載飾載省維牛維羊明神  
有察保茲萬方

薦毛血奏昭夏

羣臣出奏肆夏進熟羣臣  
入奏肆夏同上肆夏辭

我將宗祀寅獻厥誠鞠躬如在側聽無聲薦色斯純呈  
氣斯臭有滌有濯惟神其佑五方來格一人多祉明德  
惟馨於穆不已

進熟皇帝入門奏皇夏

皇帝升壇奏  
皇夏辭同

象乾上構儀以下基集靈崇祖永言孝思室陳簋豆庭  
羅懸侑夙夜畏威保茲貞吉舞貴其夜歌重其升降斯  
百祿惟饗惟應

初獻奏高明

度几筵闢牖戶禮上帝感皇祖酌維繫祿以清薦之歎  
達神明

裸獻奏高明

帝精來降應我明德禮殫義展流祉邦國既受多祉實

資孝敬祀竭其誠荷天休命

飲福酒奏皇夏

恭祀洽盛禮宣英猷爛層景廣澤同升泉上靈鍾百福  
羣神歸萬年月軌咸梯岫日域盡浮川瑞鳥飛玄扈潛  
鱗躍翠漣皇家膺寶歷兩地復參天

太祝送神奏高明

青陽奏發朱明歌西皓唱玄冥大禮罄廣樂成神心懌  
將遠征飾龍駕矯鳳旂指閭闔憩層城出溫谷邁炎庭



跨西汜過北溟忽萬億耀光精比電驚與雷行嗟皇道  
懷萬靈固王業震天聲

還便殿奏皇夏

文物備矣聲明有章登薦惟肅禮邈前王宅齊云終折  
旋告罄穆穆冕旒蘊誠畢敬屯衛按部鑒蹕回途暫留  
紫殿將及清都

周郊祀歌

後周太祖迎魏武入關聲樂闕焉恭帝元年平荊州

大獲梁氏樂器乃詔曰六樂尚矣其聲歌之節舞蹈之容不可得而詳也自宜依准成周制其歌舞祀五帝日月星辰用黃帝樂歌大呂祭九州社稷水旱雩祭用唐堯樂歌應鐘祀四望饗諸侯用虞舜樂歌南呂祀四類幸辟雍用夏禹樂歌函鐘祭山川用殷湯樂歌小呂饗宗廟用周武王樂歌夾鐘皇帝出入奏皇夏賓出入奏肆夏牲出入奏昭夏藩國客出入奏納夏功臣出入奏章夏皇后進羞奏深夏宗室會聚

奏族夏上酒宴樂奏陔夏諸侯見奏驚夏皇帝大射  
歌騶虞諸侯歌貍首大夫歌采蘋士歌采芣其文雖  
具而未及施用閔帝受禪明帝踐祚雖革魏氏之樂  
未臻雅正天和元年初造山雲舞以備六代建德二  
年六代樂成奏於崇信殿其宮懸依梁三十六架朝  
會皇帝出入奏皇夏太子出入奏肆夏王公出入奏  
驚夏諸侯正日獻玉帛奏納夏宴族人奏族夏大會  
至尊執爵奏登歌十八曲舉食奏深夏其辭皆庾信

所造

周圜丘樂歌

案隋書樂志曰周祀圜丘降神奏昭夏皇帝將入門  
奏皇夏俎入奠玉帛並奏昭夏皇帝升壇奏皇夏初  
獻及初獻配帝並奏雲門之舞獻畢奏登歌飲福酒  
奏皇夏撤奠奏雍樂帝就望燎位還便坐並奏皇夏  
凡十二章庾信撰

降神奏昭夏

重陽裡祀大報天景午封壇肅且圜孤竹之管雲和弦  
神光來下風肅然王城七里通天臺紫微斜照影徘徊  
連珠合璧重光來天策暫轉鉤陳開

將入門奏皇夏

旌迴外壝蹕靜郊門千乘按轡萬騎雲屯藉茅無咎掃  
地惟尊揖讓展禮衡璜節步星漢就列風雲相顧取法  
於天降其永祚

俎入奏昭夏

日至大禮豐犧上辰牲牢修牧繭栗毛純俎豆斯在陶  
匏以陳大報反命居陽兆日六變鼓鐘三和琴瑟俎奇  
豆偶惟誠惟質

奠玉帛奏昭夏

園玉已奠蒼幣斯陳瑞形成象璧氣含春禮從天數智  
總園神為祈為祀至敬咸遵

陞壇奏皇夏

七里是仰八陞有憑就陽之位如日之升思虔肅肅施

敬繩繩祝史陳信玄象斯格惟類之典惟靈之澤幽顯  
對揚人神咫尺

初獻作雲門舞

獻以誠鬱以清山壘舉沈齊傾惟尚饗洽皇情降景福  
通神明

初獻配帝作雲門舞

長丘遠歷大電遙源弓藏高隴鼎沒寒門人生於祖物  
本於天真神配德迄用康年

初獻及配帝畢奏登歌

歲之祥國之陽蒼靈敬翠雲長象為飾龍為章乘長日  
坏蟄戶烈雲漢迎風雨六呂歌雲門舞省滌濯真牲牲  
鬱金酒鳳凰尊迴天睠顧中原

飲福酒奏皇夏

國命在禮君命在天陳誠惟肅飲福惟虔洽斯百禮福  
以千年鉤陳掩映天駟徘徊彫禾飾竿翠羽承壘受斯  
茂祉從天之來



撤奠奏雍樂

禮將畢樂將闌迴日轡動天闕翠鳳搖和鑾響五雲飛  
三步上風為馭雷為車無轍迹有煙霞暢皇情休靈命  
雨留甘雲餘慶

就望燎位奏皇夏

六典聯事九司咸則率由舊章於焉允塞掌禮移次燔  
柴在焉煙升玉帛氣斂牲牷休氣馨香膋芳昭晰翼翼  
虔心明明上徹

還便殿奏皇夏

玉帛禮畢人神事分嚴承乃瞻瞻仰迴雲輦路千門王  
城九軌式道移候司方迴指得一惟清於萬斯寧受茲  
景命于天告成

周方澤樂歌

案隋書樂志曰周祀方澤樂降神及奠玉帛並奏昭  
夏初獻奏登歌舞辭同圜丘望坎並奏皇夏凡四章

庾信撰

降神奏昭夏

報功陰澤展禮玄郊平琮鎮瑞方鼎升庖調歌絲竹縮  
酒江茅聲舒鐘鼓器質陶匏列燿秀華凝芳都荔川澤  
茂祉丘陵容衛雲飾山巘蘭浮汎齊日至之禮歆茲大  
祭

奠玉帛奏昭夏

曰若厚載欽明方澤敢以敬恭陳之玉帛德包含養功  
藏靈迹斯箱既千子孫則百

初獻登歌

舞辭同園丘

質明孝敬求陰順陽壇有四陛琮為八方牲牲膋蕕滌蕭  
合馨香和鸞戾止振鷺來翔威儀簡簡鐘鼓喤喤聲和  
孤竹韻入空桑封中雲氣坎上神光下元之主功深蓋  
藏

望坎位奏皇夏

司筵撤席掌禮移次迴顧封壇恭臨坎位座玉埋組藏  
芬歛氣是曰就幽成斯地意

周祀五帝樂歌

案隋書樂志曰周祀五帝奠玉帛及初獻並奏皇夏  
皇帝初獻五帝及初獻配帝並奏雲門舞凡十二章  
庾信撰

奠玉帛奏皇夏

嘉玉惟芳嘉幣惟量成形依禮稟色隨方神班其次歲  
禮惟常威儀抑抑率由舊章

初獻奏皇夏

惟令之月惟嘉之辰司壇宿設掌史誠陳敢用明禮言  
功上神鉤陳旦闢闔闔朝分旒垂象冕樂奏山雲將迴  
霆策暫轉天文五運周環四時代序鱗次玉帛循迴樽  
俎神其降之介福斯許

獻青帝奏雲門舞

甲在日鳥中星禮東后奠蒼靈樹春旗命青史候鴈還  
東風起歌木德舞震宮泗濱石龍門桐孟之月陽之天  
億斯慶兆斯年

配帝舞

帝出於震蒼德於神其明在日其位居春勞以定國功  
以施人言從配祀近取諸身

獻赤帝奏雲門舞

招搖指午對南宮日月相會實沈中離光布政動溫風  
純陽之月樂炎精赤雀丹書飛送迎朱絃絳鼓聲虔誠  
萬物含養各長生

配帝舞

以炎為政以火為官位司南陸享配離壇三和實俎百  
味浮蘭神其茂豫天步艱難

獻黃帝奏雲門舞

三光儀表正四氣風雲同戊巳行初歷黃鐘始變宮平  
琮禮內鎮陰管奏司中齊壇芝曄曄清野杜馮馮夕牢  
芬六鼎安歌韻八風神光乃超忽佳氣恒蔥蔥

配帝舞

四時咸一德五氣或同論猶吹鳳凰管尚對梧桐園器



園居土厚位總配神尊始知今奏樂還用我雲門

獻白帝奏雲門舞

案宋謝莊造明堂五帝歌用木三火七土五金  
九水六歷代俱仍其舊制此篇白帝歌獨用四  
言不用九言蓋義取生數也

肅靈兌景承配秋壇雲高火落露白蟬寒帝律登年金  
精行令瑞獸霜耀祥禽雪映司藏肅殺萬保

一作寶

咸宜

厥田上上收功在斯

配帝舞

金行秋令白帝朱宣司正五雉歌庸九川執文之德對  
越彼天介以福祉君子萬年

獻黑帝奏雲門舞

北辰為政玄壇北陸之祀員官宿設玄圭浴蘭坎德陰  
風御寒次律將迴窮紀微陽欲動細泉管猶調於陰竹  
聲未入於春絃待歸餘於送歷方履慶於斯年

配帝舞

地始坼虹始藏服玄玉居玄堂沐蕙氣浴蘭湯匏器潔  
水泉香陟配彼福無疆君欣欣此樂康

隋郊祀歌

文帝仁壽初煬帝為皇太子上言曰清廟歌辭文多  
浮麗不足以揄揚功德請更議之於是制詔牛弘等  
更詳故實改定樂詞大業初又令柳許等多增開皇  
樂器大益樂員郊廟歌辭並依舊制維新造高祖廟  
歌九曲而已繼又令祕書省定殿前工歌十四首太

常刪定樂曲一百四首雖以詩為本參以古調然未  
嘗播之絃歌被之金石亦竟無成功焉今特錄其當  
時所用郊祀等辭七篇

隋園丘歌辭

案隋書樂志曰仁壽元年詔牛弘柳顧言許善心虞  
世基蔡徵等創製雅樂歌辭其祀園丘降神奏昭夏  
皇帝升壇奏皇夏次奏登歌初獻奏誠夏既獻奏文  
舞飲福酒奏需夏次奏武舞送神奏昭夏皇帝就燎

位還大次並奏皇夏辭同升壇凡八章案陳氏禮書  
曰古者正祭有常數非正祭者無常時故歲祭天者  
四春祈穀左氏所謂啓蟄而郊是也夏祈穀所謂龍  
見而雩是也秋報月令所謂季秋大享帝是也冬報  
周禮所謂冬至至於地上之圜丘是也凡此正祭也  
旅類造禱祀之屬非正祭也据此祭雖有四而冬至  
圜丘為特重此云圜丘歌辭殆祭天之禮之尤大者  
乎

降神奏昭夏

肅祭典協良辰具嘉薦俟皇臻禮方成樂已變感靈心  
迴天睠闕華闕下乾宮乘精氣御祥風望燿火通田燭  
膺介圭受瑄玉神之臨慶陰陰烟衢洞宸路深善既福  
德斯輔流鴻祚徧區寓

升壇奏皇夏

就燎還大次並  
奏皇夏辭同

於穆我君昭明有融道濟區域功格玄穹百神警衛萬  
國承風仁深德厚信洽義豐明發思政勤憂在躬鴻基

惟永福祚長隆

登歌

德深禮大道高饗穆就陽斯恭陟配惟肅血膺升氣冕  
裘標服誠感青玄信陳史祝祇承靈貺載膺多福

初獻奏誠夏

肇禋崇祀大報尊靈因高盡敬掃地惟誠六宗隨兆五  
緯陪營雲和發韻孤竹揚清我粢既潔我酌惟明元神  
是鑒百福來成

既獻文舞

皇矣上帝受命自天  
睿圖作極文教遐宣  
四方鑒觀萬品陶甄  
有苗斯格無得稱焉  
天地之經和樂具舉  
休徵咸萃要荒式序  
正位履端秋霜春雨

飲福酒奏需夏

禮以恭事薦其饗時  
載清玄酒備潔薌其  
迴旒分爵思媚軒墀  
惠均徹俎祥降受釐  
十倫以具百福斯滋  
克昌厥德永祚鴻基



# 次武舞

御歷膺期乘乾表則成功戡亂順時經國兵暢五材武  
洪七德憬彼遐裔化行充塞三道備舉二儀交泰情發  
自中義均莫大祝敬恭肅鐘鼓繁會萬國斯歡兆人斯  
賴享茲介福康哉元首惠我無疆天長地久

## 送神奏昭夏

享序洽祀禮施神之駕嚴將馳奔精驅長離耀牲烟達  
潔誠照騰日馭鼓電鞭辭下土升上玄瞻寥廓杳無際

澹羣心留餘惠

隋五郊歌辭

案隋書樂志曰五郊各有歌辭青帝奏角音赤帝奏徵音黃帝奏宮音白帝奏商音黑帝奏羽音凡五章迎送神登歌與圜丘同案朱子曰郊而曰天尊之也故以后稷配明堂而曰帝親之也故以文王配据此在人尊親之心在天則惟於穆之運天與帝尚無分又烏有所謂五帝哉自諸儒附會以為五天帝者

曰靈威仰赤熛怒白招拒叶光紀含樞紐以為五人  
帝者曰太皞炎帝黃帝少皞顓頊秦襄公攻戎救周  
列為諸侯而居西自以為主少皞之神作西時祀白  
帝繼而諸時並興或由夢蛇而為廊時或因獲石聞  
雉而為陳寶或由雨金而為畦時又繼而有青帝黃  
帝炎帝之祠俱以時名至漢高祖立黑帝祠以備五  
時而五帝俱祀矣後孝文用新垣平之言立渭陽五  
帝之廟孝武採繆忌之說建太一天皇之壇諸方士

言天神貴者太一太一佐者五帝雖以賈誼之賢親承宣室鬼神之問卒不能正其失惜哉逮世祖中興建武郊天不復襲漢初之迹甘泉諸時未嘗領之祠官真可謂卓識超前古矣自宋以至隋明堂享五帝代有樂歌今姑錄之以備參考

青帝歌

角音

案五帝歌自宋以來俱以木三火七金九土五

水六撰辭梁武帝普通中享廟薦蔬以後有相  
和五引用宮商角徵羽係蕭子雲所改造茲祀  
五帝歌亦用五音分屬意蓋本諸此也

震宮初動木德惟仁龍精戒旦鳥歷司春陽光煦物溫  
風先導巖處載驚膏田已冒犧牲豐潔金石和聲懷柔  
備禮明德惟馨

## 赤帝歌

## 徵音

長羸開序炎上為德執禮司萌持衡御國重離得位芒  
種在時含櫻薦實木槿垂蕤慶賞既行高明可處順時  
立祭事昭福舉

黃帝歌

宮音

爰稼作土順位稱坤孕金成德履艮為尊黃本內色宮  
實聲始萬物資生四時咸紀靈壇汎掃盛樂高張威儀  
孔備福履無疆

白帝歌

商音

西成肇節盛德在秋三農稍已九穀行收金氣肅殺商  
威颶戾嚴風鼓莖繁霜殞蒂厲兵詰暴勅法慎刑明神  
降嘏國步惟寧

黑帝歌

羽音

玄英啟候冥陵初起虹藏於天雉化於水嚴闕重閉星

迴日窮黃鐘動律廣莫生風元樽示本天產惟質恩覃  
外區福流景室

隋感帝歌

案隋書樂志曰祀感帝奏誠夏迎送神登歌與圜丘  
同

感帝奏誠夏

禘祖垂典郊天有章以春之孟於國之陽蒔粟惟誠陶  
匏斯尚人神接禮明幽郊暢火靈降祚火歷載隆烝哉



帝道赫矣皇風

隋雩祭歌

案隋書樂志曰雩祭奏誠夏迎送神登歌與圜丘同  
案通考楊氏曰啟蟄而郊龍見而雩此詩序所謂春  
夏祈穀於上帝也龍見而雩與周禮所掌春秋所書  
不同周禮帥雩而舞雩為旱而雩也春秋書雩二十  
有一因旱而雩也龍見而雩乃建巳之月蒼龍昏見  
東方萬物始盛待雨而長聖人為民之心切遂為百

穀祈膏雨與啓蟄之郊其意同是以樂則必用盛樂  
與他祭不同聲音之號所以詔告於天地之間以達  
神明也据此雩有常行者有為旱而行者總歸鄭玄  
所云吁嗟求雨之意自漢至陳齊樂歌或三四五七  
九言不一其辭茲篇獨四言一句三言一句相錯成  
文似於前代體製中特為創設然其音調諒與七言  
無殊也

雩祭奏誠夏

朱明啓候時載陽肅若舊典延五方嘉薦以陳盛樂奏  
氣序和平資靈祐公田既雨私亦濡人殷俗富政化敷  
隋蜡祭歌

案隋書樂志曰蜡祭奏誠夏迎送神登歌與圜丘同  
案禮記天子大蜡八伊耆氏始為蜡蜡也者索也歲  
十二月合聚萬物而索饗之也又蔡邕獨斷曰四代  
臘之別名夏曰嘉平殷曰清祀周曰大蜡漢曰臘据  
此歷代皆有蜡祭隋獨創此故特附於郊祀後

蜡祭奏誠夏

四方有祀八蜡酬功收藏既畢榛葛送終使之必報祭之斯索三時告勞一日為澤神祇必來鱗羽咸致惟義之盡惟仁之至年成物阜罷役息人皇恩已洽靈慶無垠

隋朝日夕月歌

案隋書樂志曰朝日夕月並奏誠夏迎送神登歌與圜丘同案通考楊氏曰春分朝日秋分夕月此祭日

月之正禮也天地至尊故用其始而祭以二至日月  
次天地故祭以二分此外則因事而祭如大報天而  
主日配以月此因郊而祭也覲禮拜日於東門之外  
禮日於南門外禮月於北門外此因覲禮而行也日  
月星辰之神則雪霜風雨之不時於是禋之此因禋  
而祭也据此則云朝日夕月殆祭日月之正禮歟

朝日奏誠夏

扶木上朝瞰崦山沉暮景寒來遊晷促暑至馳輝永時

和合璧耀俗泰重輪明執圭盡昭事服冕罄虔誠

夕月奏誠夏

澄輝燭地域流光鏡天儀歷草隨弦長珠胎逐望虧成  
形表蟾兔竊藥資王母西郊禮既成幽壇福惟厚

隋方丘歌

案隋書樂志曰祭方丘迎神奏昭夏奠玉帛奏登歌  
獻皇地祇奏誠夏送神奏昭夏餘並同圜丘案陳氏  
禮書曰祭地之禮周禮所謂夏日至於澤中之方丘

正祭也禱祠之屬非正祭也又揚氏曰特祭天地乃  
報本之正祭也故其禮一而專並祭天地因事而告  
祭也故其禮要而簡如武王之伐商底商之罪告於  
皇天后土成王之營洛丁巳用牲於郊翼日戊午乃  
社於新邑凡因事並告天地有同日而舉有繼日而  
舉者此所謂告祭也据此則祀方丘殆祭地之正禮  
歟

迎神奏昭夏

柔功暢陰德昭陳瘞典盛玄郊篚罍清膋鬯馥皇情虔  
具寮肅笙頌合鼓鼗會出桂旗屯孔蓋敬如在肅有承  
神胥樂慶福膺

奠玉帛登歌

道惟生育器乃包藏報功稱範殷薦有常六瑚已饋五  
齊流香貴誠尚質敬洽義彰神祚惟永帝業增昌

皇地祇歌辭奏誠夏

厚載垂德崑丘主神陰壇吉禮北至良辰鑒水呈潔牲



粟表純樽壺夕視幣玉朝陳羣望咸秩精靈畢臻祚流  
於國祉被於人

送神奏昭夏

奠既徹獻已周竦靈駕逝遠游洞四極帀九縣慶方流  
祉恒遍埋玉氣掩牲芬晰神理顯國文

隋神州歌

案隋書樂志曰祭神州奏誠夏迎送神登歌與方丘  
同案既有方丘以祀地又祭神州禮曰天子親地有

社存焉不聞其有神州之祭也有之自隋始

神州奏誠夏

四海之內一和之壤地曰神州物賴生長咸池既降泰  
折斯饗牲牷尚黑珪玉實兩九寓載寧神功克廣

隋社稷歌

案隋書樂志曰祭社稷奏誠夏迎送神登歌與方丘  
同案陳氏禮書曰社所以祭五土之神稷所以祭五  
穀之神五穀之神而命之稷以其首種先熟而長百

穀故也稷非土無以生土非稷無以見生生之效故  
祭社必及稷以其同功均利而養人也又案月令孟  
春天子乃以元日祈穀於上帝仲春擇元日命民社  
所謂春祈也季秋大饗帝嘗所謂秋報也又案甫田  
之詩曰以我齊明與我犧羊以社以方朱子集傳云  
社后土也以勾龍氏配方秋祭四方報成萬物周禮  
所謂羅弊獻禽以祀祊是也蓋楚茨諸什俱為報賽  
之樂歌隋時祈報特分社稷又後人踵事增華之意

也

春祈社奏誠夏

厚地開靈方壇崇祀達以風露樹之松梓勾萌既申芟  
柞伊始恭祈粢盛載膺休祉

春祈稷奏誠夏

粒食興教播厥有先尊神致潔報本惟虔瞻榆東耒望  
杏開田方憑馭福佇詠豐年

秋報社奏誠夏

北墉申禮單出表誠豐犧入薦華樂在庭原隰既平泉  
流又清如雲已望高廩斯盈

秋報稷奏誠夏

人先

一作天

務急農亦勤止或蓂或蕓惟蠶惟芑涼風戒

時歲云秋矣物成則報功施必祀

隋先農歌

案隋書樂志曰享先農奏誠夏迎送神與方丘同案  
周禮籥章凡國祈年於田祖則吹豳雅擊土鼓以樂

田峻田祖先嗇也謂始耕田者即神農也祭先農大抵在藉田時故宣王不藉千畝號文公諫曰匱神之祀而困民之財將何以求福用民自漢以來無祭先農樂章隋獨創此篇猶可見重農務本之意云


先農奏誠夏

農祥晨晰土膏初起春原俶載青壇致祀斂蹕長阡迴旌外壝房俎飾薦山壘沉滓親事朱紘躬持黛耜恭神務穡受釐降祉



御製律呂正義後編卷九十四





總校官庶吉士臣張能照

校對官中書臣馮培

膳錄監生臣周志禮